

中國方志叢書·華北地方·第三三二號

據

清

·

黃

泳

第

纂

修

本

影

印

甘肅省

成縣新志

(二)

成文出版社有限公司印行

中華民國五十九年二月臺一版

成縣新志

全二冊

發行人：黃 成 助

台北郵政信箱二二六〇五號
出版者：成文出版社有限公司

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：東南印製廠有限公司

和平西路二段70巷83弄29號

內政部登記證內版台業字第一一四七號

成縣新志卷之三

成縣知縣射江黃 泳 纂修

人物

鄉賢

天高地下萬物散殊而人爲之靈成雖邊隅然山水之秀
應產英豪彼仙李之發祥者無論自伯約而下挺生者不
其盛歟夫人傑地靈都人士當思所以應鍾毓者矣作人
物志

漢姜維字伯約天水人也幼孤與母居仕郡爲從事以父
郡功曹罔戰沒賜維官中郎參本郡軍事建興初諸葛

武侯軍向祁山維及功曹主簿乃俱詣武侯武侯署維
爲奉義將軍與叅軍蔣琬書曰姜伯約忠勤時事思慮
精密心存漢室而才兼於人上士也後爲輔漢將軍封
平襄侯亮卒維還成都得母書令求當歸維曰良田百
頃不在一畝但有遠志不在當歸延熙初大將軍蔣琬
以維爲司馬數帥偏軍西入累遷錄尚書事維自以練
西方風俗兼負其才武欲誘諸羌以爲羽翼謂自隴以
西可斷而有也每欲大舉費禰常裁諫之及禰卒維率
萬人出隴西斬首破敵維乘勝多所降下十八年後與

夏侯霸等俱出狄道大破王經於洮西十九年遷爲大

將軍振飭戎馬與胡濟期會上邽濟違誓不會遂爲鄧

艾所敗隴西騷動後艾入蜀維被後主令乃詣鍾會降

會厚待維權還其印節相得甚歡維知會有異志因搆

會反欲使會盡殺北來諸將已因殺會復立漢故帝密

書與帝曰願陛下忍數日之辱臣欲使社稷危而復安

日月幽而復明會欲從維言猶豫未決會帳下督郎建

漏泄諸軍鼓噪殺會及維維死時見剖膽如斗大云維

少好鄭氏學熟於軍事讀書明大義事蜀數見奇功稱

忠勤陰平之敗維欠一死世或以此少之獨不思其歸
會也計構會反魏終爲漢其密致漢帝書皎然不可泯
謀將成而物敗之維卽不死維豈有忘漢之心哉武侯
與公琰書曰此人心於漢室而兼才過人可謂知維之
淡者矣

宋劉愿天水人天資耿介時王安石新書盛行學者靡然
向風愿不喜穿鑿附會之說潛心伊洛正宗後以八行
舉

張詔字君卿成州人少隸張俊麾下積功守和州嘗奉

命使金一日金國持所繪祐獻二陵像至館中皆北地服詔向之再拜館人問之答曰詔雖不識其人但龍鳳之姿天日之表自非恒民祖宗也孝宗聞而嘉之初趙汝愚奏請以詔代領武興軍杜吳氏握兵之漸及汝愚既知樞密力請於光宗曰若武興朝除帥則臣夕拜命上許之乃以詔爲成州團練使興州諸軍都統制詔在興州甚得志

張威字德遠成州人仕爲利州副都統制屢立奇功嘉定中官終揚州觀察使威初在行伍以勇見稱進充偏

裨每戰輒克臨陣戰酣則精采愈奮兩眼皆赤時號張鵲眼金人聞其名畏憚之

宋史有傳

曹友聞字允叔同慶栗亭人也彬十二世孫少有大志與弟友諒千里尋師取友登寶慶初進士授綿竹尉改天水軍教授時城已被圍友聞單騎夜入與守臣張維糾民厲兵戰退後權知沔州元兵入興元制置使趙彥呐檄友聞控制大安友聞曰吾重兵在此敵必不能越沔入蜀彥呐不從友聞馳至雞冠隘與敵殊死戰北兵以鐵騎圍繞友聞殺所乘馬血戰愈力與弟萬友諒俱

死之事聞贈龍圖閣學士賜廟褒忠諡曰節

曹友慶友聞弟也西城滿子阿釐拒境不廷友慶力戰
獲之天子賜以紋綺勞之襲父爵拜武德將軍佩虎符
從汪叅政殄滅雲南土寇賴以輯寧拜宣武將軍施州
容美洞麥色釋侵叛友慶出已金幣鈔錠傾誘歸欵詣
關待罪議者謂友慶勞績甚多其居鄉輕財振陋有長
者之譽

元汪世顯鹽川人也襲世職鎮鞏昌開拓西蜀有功拜便
宜都總帥贈推忠協力佐運功臣太師開府儀同三司

上柱國追封隴右王諡義武子七人忠臣鞏昌便宜副
總帥德臣都統帥直臣都總領良臣中書右丞翰臣與
魯兵馬都元帥佐臣左翼都總領清臣四川行樞密院
副使累世廕封今其子系留於成縣者甚衆

汪維正世顯孫幼穎悟藏書貳萬卷喜從文士論議古
今治亂尤喜談兵累官中書右丞行秦蜀中書省事改
陝西行省左丞卒諡貞肅二子嗣昌成都管軍副萬戶
壽昌江南行臺中丞

楊大淵天水人與兄大全大楫皆仕宋大淵總兵守閬

州元憲宗至閬遣使來招大淵殺之憲宗怒督諸軍力
攻大淵不支乃降後爲管軍總管有戰功世祖數獎諭
之及卒追封閬中郡公諡肅翼子文榮仕爲閬蓬等路
都元帥

楊文安大淵兄大全之子大全守敘州元兵入蜀大全
戰死贈眉州防禦使諡愍忠官其長子文仲時文安方
二歲依大淵於閬州中統初授監軍遷閬州夔東路安
撫使積功甚多再遷叅知政事行四川南道宣慰使子
艮之歷湖南宣慰使岳州總管

明汪宗賢字希顏縣人世顯七代孫也父德忠洪武間舉
茂才任趙州判官時宗賢年十三侍父宦遊攻苦嗜學
不事統綺永樂中以書經選入太學授江南松江府通
判蒞任之初適值朝廷遣大臣築寶山於海隅承役之
人以十萬計命選才能幹濟之官以董其事得首膺是
選乃率衆趨事赴功以盡厥心其蒞政興學校勸農桑
招逋逃恤刑獄政通人和百廢俱舉三年上其事功於
朝大官考曰以正直之資任繁郡之佐事集民安實爲
課最都院復考曰公以處事勤以幹辦剴繁治劇佐

是稱以子許仕顯封戶部郎中奉政大夫

汪許字清夫宗賢子也宣德舉於鄉登正統進士授戶部主事歷員外郎中景泰間奉勅選募隴右民兵禦敵有功錫之誥命誥曰發身科第列屬地官陞秩正郎式克勤慎厥績旣最薦紳榮之遷江南蘇州府知府政績著聞甫三載卒於官郡邑俱入祀鄉賢

武彥縣人剛勁嚴明知識才幹過人初任湖廣按察司經歷在任三年賢聲遠播以諸司薦擢浙江道監察御史風裁更爲首稱尋陞浙江寧波府知府歸老終於家

陳尚表縣人萬曆中恩選初任山東歷城丞有賢聲陞授四川井研知縣政績丕著名達宸聰錫之誥命勅曰昔貳平陵已稱幹理茲除錦水益著廉明宜勵初心尚需顯陟遷雲南陸涼州知州未任丁父憂起復補四川眉州知州會奢酋作亂築城防禦募兵驅敵大有勞績誥命重褒勅曰操履潔清才猷敏練蜚聲邑宰晉秩專城而能砥礪官方精核吏事用蒲鞭以爲治萬民悉宥於寬和解化瑟而更調百務悉歸於振頓轉陞湖廣常德府同知鄉居養恬決意不赴屢徵蒞任未三月苦累

告休准題晉階中憲大夫年六十三卒於家後人追慕
功著宦途德孚鄉評入鄉賢祠享祀

鍾其偉字卓然號偉度縣人也性至孝得繼母心天啓
二年應恩選崇正初授山東安邱縣丞尋陞湖廣枝江
知縣多異政聞母訃號泣歸枝民赴當事乞留偉止以
情建生祠以祝者三一在治中一洋溪鎮一董市鎮後
補山東棲霞縣值流寇披猖偉多方堵截民賴以安獻
洗甲膚功圖題詠最多其政績見兩縣去思碑歸里後
邑令謝公纂志尤相引重云

鍾其碩字巍然號碩度其偉弟也崇正元年選貢十一年授鎮平縣十四年遇難罵賊不屈死之先是流賊李自成倡亂陝西諸方震動碩到任之日卽修理城池召募民兵爲豫備之計後自成兵至河南陷鎮平民兵皆棄城逃碩獨正衣冠北面俯伏泣曰臣文吏也力無能爲以此身輸朝廷耳遂孤身端坐堂上賊衆強擁碩至賊營賊踞牀嫚罵強以跪碩厲聲曰朝廷守土之臣豈跪汝逆賊耶賊見碩氣宇軒昂言辭壯烈不忍加害因誘之曰汝吾鄉里也碩曰吾豈有汝賊鄉里乎罵不絕

口賊衆以石擊其齒鮮血噴出而罵聲益厲賊怒詰問
縣印所在碩自懷中出印直擊中賊胸左右驚撲殺之
慘不忍言然實義重之命以禮殯且嚴令無擾內署子
篤庠廩孫元文庠生後子孫繁衍衣冠相繼碩性嚴正
讀書無間寒暑爲諸生時儀範莊肅舉動笑言不苟同
學偶不自檢者羣望而避之其見憚於人如此居官廉
隅自持誠心愛物其登山禱雨記一篇披肝瀝血爲民
請命可以見其大概矣

國朝汪宗徽字繩武庠增進士許六世孫讀書明道修德立